

BULETIN

# MMBAR

WARTA KEGIATAN LEMBAGA AMANAH KEBAJIKAN MASJID NEGERI SARAWAK

BIL 143 (04/2018) / OKT-DIS 2018

PERCUMA



*Program*  
**“Pledge And Plant A Tree”**  
Di Pusat Pengajian Al-Quran Tun Abdul-Rahman Ya’kub

- Pokok Gaharu (*Aquilaria subintegra*)

- Golden Penda (*Xanthostemom chrysanthus*)



لِمَاجِدِ اَمَانَةِ كَبِيْرِكُنْ مَسْجِدِ نَكْرُنْ سَارَاوَك  
LEMBAGA AMANAH KEBAJIKAN MASJID NEGERI SARAWAK

## SIDANG REDAKSI

### PENAUNG

Yang Berbahagia Tan Sri Datuk Amar Haji Bujang bin Mohd Nor Setiausaha Kehormat Lembaga Amanah Kebajikan Masjid Negeri Sarawak

### PENASIHAT

Tuan Haji Mohamad Sabry bin Haji Othman Pengurus Besar Lembaga Amanah Kebajikan Masjid Negeri Sarawak

### EDITOR

Megawati binti Haji Julaihi Ketua, Sektor Pentadbiran dan Pengurusan

Nona Zaharia binti Fadzil Ketua, Sektor Kewangan

### PENGARANG

Noratini binti Sebri Ketua, Bahagian Pengurusan Sumber Manusia (Group HR LAKMNS)

Haryati binti Mohamad Ketua, Bahagian Penyelidikan dan Pembangunan

Haji Poniman bin Margiman Ketua, Bahagian Keselamatan

### PENOLONG PANEL EDITOR

Rahimah binti Ariffin, Guru MATTARY Misiah binti Wajhi, Guru MATTARY Azlyn binti Abdul Rahman, Guru MATTARY Nurul Ikhsan binti Bohari, Guru MATTARY

## Wacana Pengarang

Dengan nama Allah Yang Maha Pemurah Lagi Maha Penyayang, syukur atas segala limpah kurniaannya kepada kita. Selawat dan salam buat Baginda Rasulullah S.A.W., kepada ahli keluarga Baginda, para sahabat Baginda.

## Assalamualaikum warahmatullahi wabarakatuh

Alhamdulillah, kita hampir melabuhkan tirai 2018 tidak lama lagi dan syukur kepada Allah S.W.T. kerana masih lagi memberikan kita kehidupan untuk meneruskan amanah di muka bumi ini.

Pembaca yang dirahmati Allah S.W.T. sekalian,

Sesungguhnya Allah S.W.T. berfirman di dalam Surah al-A'raf , ayat 54 yang bermaksud:

"Sesungguhnya Tuhan kamu Allah yang telah menciptakan langit dan bumi dalam enam masa, lalu Dia bersemayam di atas Arasy (sifat Allah) Dia menutupkan malam dengan siang yang mengikutinya dengan cepat dan (diciptakan-Nya pula) matahari, bulan dan bintang-bintang, (masing-masing) tunduk kepada perintah-Nya. Ingatlah, hanya Allah urusan menciptakan dan memerintah. Maha Suci Allah, Tuhan semesta alam."

Ayat di atas jelas menunjukkan bahawa Allah S.W.T. sebagai Tuhan yang Maha Pemurah dan Maha Agung yang telah menciptakan segala isi di langit dan di bumi. Oleh yang demikian, kita sebagai hamba yang patuh kepada ajaran Islam wajib untuk menjaga bumi dan alam sekitarnya dengan penuh rasa tanggungjawab.

Sejak kebelakangan ini, kita digemparkan dengan pelbagai bencana seperti gempa bumi di Palu, Indonesia, letusan gunung berapi Anak Krakatau yang mengakibatkan tsunami di Banten, Indonesia, ribut tropika Usman yang mengorbankan lebih 70 orang penduduk di Manila, Filipina dan bermacam-macam lagi.

Bencana-bencana seperti ini jelas membuktikan bahawa bumi yang kita duduki sejak beribu tahun dahulu semakin tenat dan menunggu pengakhiran. Malangnya, sifat manusia yang langsung tidak menghiraukan akan kepentingan menjaga alam sekitar menyebabkan kemasuhan ini kian berlaku.

Firman Allah S.W.T. di dalam Surah al-Ahzab, ayat 17 yang bermaksud: "Katakanlah: Siapakah yang dapat melindungi kamu daripada (kelentuan) Allah jika Dia menghendaki bencana atasmu atau menghendaki rahmat untuk dirimu? Mereka itu tidak akan mendapatkan pelindung dan penolong selain Allah".

Oleh itu, kita haruslah tanam sifat cintakan alam sekitar dan bersama-sama menjaga bumi yang bertuah ini untuk generasi akan datang. Sesungguhnya, segala yang berlaku merupakan kuasa Allah S.W.T. dan Dialah yang Maha Berkuasa, lagi Maha Bijaksana. Perbanyakkanlah berdoa dan beribadah kepada-Nya, sesungguhnya ujian atau musibah yang berlaku merupakan peringatan kepada kita. Wallahu alam.

Sekian, wassalam.

## BULETIN MIMBAR EDISI 143 (OKT-DIS 2018)

## > KANDUNGAN



04



12



13

- |  |  |
|--|--|
| 4 <b>Program Pledge and Plant a Tree</b><br>5 <b>DARI HULU KE MUARA</b><br><b>Masjid Silaturrahmi, Kampung Iboi,<br/>           Sadong Jaya</b><br>6 <b>Imarah Masjid dan Surau</b><br>7 <b>Sambutan Mulidur Rasul</b><br>8 <b>Bengkel Penulisan Eksekutif</b><br>9 <b>Program Pemerksaan Warga Pelajaran</b><br>10 <b>Kursus Polis Bantuan LAKMNS Siri 3</b><br>11 <b>Taklimat Tabung Haji</b><br>11 <b>Bengkel Pemandu Berhemah</b><br>12 <b>Majlis Konvokesyen ke 9 TATTARY</b><br>13 <b>Majlis Graduasi ke 3 MATTARY</b> | 14 <b>Berita Bergambar</b><br>16 <b>Seruan Mimbar</b><br>18 <b>Majlis Haflah Al-Faniyah (Hari Kesenian) Ke-3 TATTARY</b><br>19 <b>Sesi ujian dan temuduga kemasukan Tingkatan 1</b><br>19 <b>Hari Pendaftaran bagi kemasukan murid-murid ke TATTARY</b><br>20 <b>Pelajar-pelajar Terbaik MATTARY Tahun 6</b><br>21 <b>Sejarah Awal Masjid Bandaraya Kuching</b><br>22 <b>Perancangan Kewangan</b><br>23 <b>Profil Warga LAKMNS</b> |
|--|--|

*Firman Allah S.W.T.:*

*“Dan janganlah kamu berbuat kerosakan di atas muka bumi sesudah (Allah) memperbaikinya, dan berdoalah kepada-Nya dengan rasa takut (tidak akan diterima) dan harapan (akan dikabulkan). Sesungguhnya rahmat Allah amat dekat kepada orang yang berbuat baik.”*

(Surah Al-A'raf: ayat 7)

Berdasarkan firman Allah S.W.T. di atas, dapat kita simpulkan bahawa Islam amat menitikberatkan pemuliharaan alam sekitar untuk mewujudkan suasana yang harmoni dan selesa.

Sehubungan itu, Program Pledge and Plant a Tree telah dianjurkan oleh Malaysian Institute of Planners (MIP) dengan kerjasama Dewan Bandaraya Kuching Utara (DBKU) dan Lembaga Amanah Kebajikan Masjid Negeri Sarawak (LAKMNS) pada 10 November 2018 di perkarangan Pusat Pengajian Al-Quran Tun Abdul-Rahman Ya'kub (PATARY).

Program ini telah dirasmikan oleh Yang Berbahagia Datuk Haji Abang Wahab bin Haji Abang Julai, Datuk Bandar Kuching Utara merangkap Bendahari Kehormat LAKMNS.



## PROGRAM ‘PLEDGE AND PLANT A TREE’

Terdapat dua jenis pokok yang ditanam iaitu:-

- i. Empat batang pokok Gaharu (*Aquilaria subintegra*) - ditanam oleh Dif Kenamaan; dan
- ii. 150 batang pokok Golden Penda (*Xanthostemom chrysanthus*) - ditanam oleh jemputan awam

Seramai 200 orang termasuk murid Tahun 6 Ma'had Tahfiz Tun Abdul-Rahman Ya'kub (MATTARY) telah menghadiri program ini.

Secara keseluruhannya, program ini dapat memberi kesedaran kepada peserta-peserta program tentang kepentingan menghijaukan persekitaran.



# HULU KE MUARA

## MASJID SILATURRAHMI KAMPUNG IBOI, SADONG JAYA



Masjid Silaturrahmi yang terletak di Kampung Iboi, Daerah Sadong Jaya telah dibina pada 13 Januari 1992 dan digunakan oleh penduduk kampung sekitarnya seperti Kampung Iboi, Kampung Sungai Billis dan Kampung Pelanduk.

Pada 1 Julai 2008, masjid ini telah dinaik taraf dan mampu menampung seramai 200 jemaah pada satu-satu masa.

Senibina bangunan Masjid Silaturrahmi berkoncepkan gabungan binaan tradisional dan moden. Empat tiang seri utama berdiri utuh menerapkan keindahan kubah utama yang menyajikan lampu *candelier* di tengah ruang solat. Tulisan seni khat ayat suci al-Quran pula menatari siling utama.



Manakala, dinding dan tiang masjid kebanyakannya dibuat menggunakan batu dan simen. Kubah kecil yang berwarna perak serta bumbung dua tingkat dapat dilihat dari luaran. Masjid Silaturrahmi juga menyediakan kemudahan parkir kenderaan yang luas lantas memberikan keselesaan kepada para jemaah yang hadir.

Secara keseluruhannya, Masjid Silaturrahmi mempunyai keunikannya yang tersendiri dari segi penyerapan unsur senibina dan pembangunan urus tadbir masjid.

# Imarah Masjid dan Surau



## Surau At Tawahhud Kampung Segedup Rimba Kuching

Program Lawatan Silaturahim, Penyebaran Maklumat dan Pengimaran Masjid dan Surau meneruskan misi mingguan Unit Penyelaras Kegiatan, Bahagian Masjid-masjid ke lokasi-lokasi seperti Kuching, Kota Samarahan dan Serian.

Hasrat Lembaga Amanah Kebajikan Masjid Negeri Sarawak (LAKMNS) mengadakan program seperti ini adalah bertujuan untuk meningkatkan ikatan ukhuwah bersama institusi masjid dan surau luar yang memerlukan maklumat mengenai aktiviti serta peranan LAKMNS.

Program yang diadakan sejak tahun 2000 ini telah mendapat sambutan yang amat baik oleh Jawatankuasa dan Qariah Masjid dan Surau luar yang diziarahi.

Pengisian program dimulakan dengan sembahyang Maghrib berjemaah. Kemudian, atur cara diteruskan dengan ucapan alu-aluan oleh pengurus masjid atau surau. Sejurus selepas itu, taklimat sebaran maklumat fungsi, program dan aktiviti LAKMNS oleh Ustaz Zaimi bin Sakawi, Pegawai Bahagian Penyelidikan dan Pembangunan serta Ustaz Abdul Rahman Iqbal bin Aldi, Pegawai Unit Penyelaras Kegiatan.

Selepas itu, sesi penyampaian cenderamata kepada jawatankuasa masjid serta sesi fotografi mengakhiri pengisian program sebelum sembahyang Isyak berjemaah.

Tema intipati tazkirah yang telah disampaikan ialah Kepentingan Perpaduan serta Ukuhwa Islam.

Harapan bahagian masjid-masjid semoga hasil program lawatan yang dilaksanakan ini memberikan nantiah yang positif dan mendapat keberkatan daripada Allah S.W.T.



**“Dirikanlah solat dan keluarkan zakat dan rukuklah bersama-sama orang yang rukuk.”**  
**(al-Baqarah, Ayat 43.)**



## SAMBUTAN MAULIDUR RASUL

Penzahiran rasa kecintaan terhadap Nabi Muhammad S.A.W. sentiasa diterjemahkan melalui program dan acara yang berkaitan seperti Sambutan Maulidur Rasul.

Sambutan ini diraikan untuk menggerakkan momentum diri setiap umat Islam selaras dengan cara hidup yang dikehendaki oleh Allah S.W.T.

Sehubungan itu, Bahagian Masjid-masjid, Lembaga Amanah Kebajikan Masjid Negeri Sarawak (LAKMNS) telah mengadakan Ceramah Agama bersempena Sambutan Maulidur Rasul 1440H pada 19 November 2018 bertempat di Masjid Jamek Negeri Sarawak dan Masjid Bandaraya Kuching.

Acara dimulakan dengan sembahyang fardhu Maghrib berjemaah. Sejurus selepas itu, ceramah disampaikan oleh al-Fadhil Ustaz Muhamad Ilyas bin Muhamad Salleh, Pegawai Hal Ehwal Islam, Universiti Teknologi Mara (UiTM), Sarawak.

Tajuk ceramah yang disampaikan ialah Menyantuni Umat Membawa Rahmat. Mesej kerahmatan untuk seluruh alam amatlah bertepatan dengan perubahan zaman yang amat mencabar kini.

Majlis ini telah dihadiri oleh para pegawai dan kakitangan LAKMNS serta muslimin muslimat sekitar Kuching.





## Bengkel Penulisan Eksekutif

“Ikatlah ilmu dengan menulis”

Penulisan sangat penting dalam membangun ketamadunan manusia kerana ilmu yang dipelopori perlu dirakam dalam penulisan supaya ia dapat menjadi sumber rujukan kepada generasi pada masa akan datang. Kemahiran penulisan yang berkesan berupaya menyampaikan idea yang berasas serta menyebarkan fakta atau maklumat yang tepat kepada penerima maklumat.

Justeru itu, Bahagian Penyelidikan dan Pembangunan, Lembaga Amanah Kebajikan Masjid Negeri Sarawak (LAKMNS) telah menganjurkan Bengkel Penulisan Berpengaruh dan Berkesan untuk Kumpulan Eksekutif LAKMNS pada 15 Disember 2018 bertempat di Bilik Kuliah, Pusat Pengajian Al-Quran Tun Abdul-Rahman Ya'kub (PATARY).

Bengkel ini telah dihadiri 33 orang peserta yang terdiri daripada pegawai-pegawai LAKMNS dari pelbagai bahagian dan guru-guru dari Tadika Tahfiz Tun Abdul-Rahman Ya'kub (TATARY) serta Ma'had Tahfiz Tun Abdul-Rahman Ya'kub (MATTARY).



Penceramah jemputan bengkel ialah Dr. Haji Santrol Bin Abdullah yang merupakan Perancang Bahasa di Dewan Bahasa dan Pustaka Cawangan Sarawak.

Antara pengisian bengkel tersebut adalah:-

1. Teknik penyediaan dan penulisan dokumen-dokumen rasmi pejabat yang baik dan profesional (e.g: surat rasmi/ memorandum/ minit mesyuarat/ kertas cadangan, dll.);
2. Kaedah penulisan laporan dan artikel; dan
3. Kaedah penulisan buku.

Berdasarkan kepentingan penulisan terutama yang melibatkan dokumen-dokumen rasmi pejabat, adalah diharapkan bengkel seperti ini diadakan lagi pada masa akan datang dengan melibatkan penyertaan daripada kumpulan bukan eksekutif.



## PROGRAM PEMERKASAAN WARGA PELAJARAN

Pada 17 dan 18 November 2018 yang lalu Bahagian Penyelidikan dan Pembangunan telah mengadakan Program Pemerksaan Warga Pelajaran, Lembaga Amanah Kebajikan Masjid Negeri Sarawak (LAKMNS) di Sematan Palm Beach Resort, Sematan, Sarawak.

Seramai 71 orang peserta telah mengikuti program tersebut yang terdiri daripada guru-guru MATTARY dan TATTARY serta pegawai-pegawai Bahagian Pelajaran, LAKMNS.

Program ini bertujuan untuk memberi pededahan kepada pelaksanaan amalan Guru Penyayang, mewujudkan semangat kekitaan dan kerjasama yang jitu dalam kalangan kakitangan Bahagian Pelajaran serta membantu Bahagian Pelajaran melahirkan pekerja 3K, kakitangan yang berkualiti, komited dan kukuh integriti.



Berikut adalah senarai nama penceramah-penceramah yang terlibat dalam Program Pemerksaan Warga Pelajaran, LAKMNS:-

1. Dr. Hasnalee bin Tubah – Pensyarah Kanan, Institut Pendidikan Guru Kampus Batu Lintang
2. Ustaz Sulaiman @ Leman bin Hasim – Penolong Pengarah, Unit Pengurusan Dakwah, Sektor Pendidikan Islam, Jabatan Pendidikan Negeri Sarawak
3. Aniza binti Adil – Pegawai, Unit Kaunseling Institut Pendidikan Guru Kampus Batu Lintang
4. Mohamad bin Hamdan – Pegawai, Pengurusan dan Practicum Institut Pendidikan Guru Kampus Batu Lintang

Majlis Penutupan Program Pemerksaan Warga Bahagian Pelajaran bagi tahun 2018 telah dirasmikan oleh Puan Noratini binti Sebri, Ketua Bahagian Pengurusan Sumber Manusia (Group HR LAKMNS)

Secara keseluruhannya, program ini dapat menyuntik dan menghayati konsep guru penyayang selaras dengan objektif pelaksanaan Budaya Guru Penyayang serta meningkatkan semangat kekitaan dan yang jitu sekaligus membantu mewujudkan kemajuan dalam diri pekerja sama ada dari segi kepimpinan, kerjaya, harga diri, bakat maupun potensi.



# KURSUS POLIS BANTUAN LAKMNS SIRI 3



Bahagian Keselamatan, Lembaga Amanah Kebajikan Masjid Negeri Sarawak (LAKMNS) telah membuat pengambilan Polis Bantuan baharu seramai 26 orang anggota berpangkat Konstabel, yang terdiri daripada 21 orang anggota lelaki dan 5 orang anggota wanita.

Pada 14 November 2018, anggota Polis Bantuan baharu tersebut telah melapor diri kepada Ketua Bahagian Keselamatan, LAKMNS. Semua anggota akan menjalani Kursus Asas Polis Bantuan yang akan diadakan pada 18 November 2018 sehingga 19 Januari 2019 (63 hari) di PULAPOL Kuching.

Dalam tempoh 2 bulan tersebut, anggota akan didekah dengan latihan luar yang merangkumi latihan kawad, menembak, renang dan seni pertahanan diri. Selain itu, mereka turut memasuki kelas akademik yang meliputi pelajaran undang-undang kepolisan. Semua pelatih Polis Bantuan termasuk anggota Polis Bantuan, LAKMNS telah diberi ujian untuk latihan luar seperti kawad dan menembak serta menduduki peperiksaan yang berkaitan dengan undang-undang kepolisan.



## Taklimat Tabung Haji

Ibadah haji merupakan rukun islam yang kelima dan setiap umat islam dituntut untuk melaksanakan ibadah tersebut. Ini dijelaskan lagi melalui firman Allah S.W.T. dalam Surah Ali Imran, ayat 97 yang bermaksud:

"Di situ ada tanda-tanda keterangan yang nyata (yang menunjukkan kemuliaannya; di antaranya ialah) Makam Nabi Ibrahim. Dan sesiapa yang masuk ke dalamnya aman tenteramlah dia. Dan Allah mewajibkan manusia menuaikan ibadah haji dengan mengunjungi rumah Allah bagi sesiapa yang mampu sampai kepadanya dan sesiapa yang kufur maka sesungguhnya Allah itu Maha Kaya daripada sekalian alam".

Rentetan itu, Bahagian Penyelidikan dan Pembangunan, Lembaga Amanah Kebajikan Masjid Negeri Sarawak (LAKMNS) telah menganjurkan taklimat Lembaga Tabung Haji Cawangan Kuching, Sarawak untuk kakitangan LAKMNS pada 25 Oktober 2018 bertempat di Bilik Kuliah, Pusat Pengajian Al-Quran Tun Abdul-Rahman Ya'kub (PATARY).

Dalam taklimat tersebut, pihak Lembaga Tabung Haji turut menggalakkan peserta untuk membuat pendaftaran haji melalui akaun tabung haji sebanyak RM1,300.00 Walau bagaimanapun, sekiranya memilih untuk mendaftar haji menggunakan akaun KWSP, pendeposit perlu memastikan caruman akaun satu KWSP melebihi RM1,300.

Ahli KWSP yang layak adalah seperti berikut:-

- a) Warganegara Malaysia atau Pemastautin Tetap
- b) Beragama Islam
- c) Mempunya simpanan KWSP dalam Akaun 1 sekurang-kurangnya RM1,300.00
- d) Belum mencapai umur 55 tahun
- e) Mempunya akaun simpanan Tabung Haji

Secara keseluruhannya, diharapkan taklimat ini dapat memberi maklumat yang berguna kepada kakitangan LAKMNS agar mempunyai inisiatif untuk mendaftar haji lebih awal.



## BENGKEL PEMANDU BERHEMAH

Bahagian Penyelidikan dan Pembangunan, Lembaga Amanah Kebajikan Masjid Negeri Sarawak (LAKMNS) telah menganjurkan Bengkel Pemandu Berhemah untuk kakitangan LAKMNS pada 8 dan 9 Disember 2018 bertempat di Bilik Seminar, Pusat Pengajian Al-Quran Tun Abdul-Rahman Ya'kub (PATARY).

Pengisian pada hari pertama telah dikendalikan oleh Encik Sivaneswaran, penceramah dari MRS Management Sdn Bhd. Beliau telah berkongsi 12 tabiat memandu defensif kepada peserta-peserta. Beliau turut menekankan agar tidak menggunakan telefon bimbit semasa memandu kerana boleh menyebabkan hilang fokus meskipun menggunakan 'hands free'.

Antara 12 tabiat memandu defensif ialah:-

1. Start selamat
2. Imbasan keselamatan
3. Tali pinggang untuk semua
4. Pandang jauh
5. Imbas cermin dengan kerap
6. Isyarat
7. Imbas titik buta
8. Kelajuan selamat
9. Ruang selamat
10. Posisi selamat
11. Bergerak lancar
12. Steering tarik dan tolak

Manakala pada hari kedua, slot berkenaan Peraturan-Peraturan dan Penguatkuasaan Jabatan Pengangkutan Jalan (JPJ) disampaikan oleh Haji Nezriman bin Uthman, Penolong Pegawai Penguatkuasa JPJ.

Slot terakhir iaitu Adab sebagai Pemandu Jenazah dalam Perspektif Islam telah disampaikan oleh Haji Mohammad Ihsan bin Haji Haidzir, Timbalan Imam Besar Negeri Sarawak.



# MAJLIS KONVOKESYEN KE 9 TATTARY



Pada tanggal 11 November 2018 yang lalu, telah berlangsungnya Majlis Konvokesyen Tadika Tahfiz Tun Abdul-Rahman Ya'kub (TATTARY) kali ke-9 di Balai Budaya, Dewan Bahasa dan Pustaka, Negeri Sarawak. Majlis Konvokesyen tersebut telah dirasmikan oleh Puan Dayang Siti Aishah binti Haji Mohamad Atei, Wakil Ketua, Bahagian Pelajaran, LAKMNS.

Pada tahun ini, seramai 74 orang murid telah berjaya menghafaz Juzuk 30 dan 18 orang murid dari 4 & 5 tahun yang mendapat pencapaian cemerlang dalam Program Pendidikan Kurikulum Tahfiz Al-Quran Bersepadu (KTAB) dan Kurikulum Standard Prasekolah Kebangsaan (KSPK) diraikan dalam Majlis Konvokesyen tersebut. Pada majlis itu juga, TATTARY turut menyampaikan anugerah Hafiz Muda MASJA-SA kepada Adik Mohd Naqiuuddin bin Mohd Yusop, dari kelas 6 Cerdik atas pencapaian beliau menghafaz juzuk 30 dengan baik serta pencapaian yang cemerlang dalam akademik. Anugerah tersebut telah di sampaikan oleh Wakil Ketua, Bahagian Pelajaran, LAKMNS.



Majlis di mulakan dengan Lagu Negaraku, Ibu Pertwiuku, alunan zikir Asmaul Husna dan Doa Khatam Al-Quran oleh 18 orang murid daripada 4 dan 5 tahun. Majlis diteruskan dengan bacaan doa dari Adik Muhd Naqiuddin bin Muhd Najib dan tazkirah ringkas dari Adik Mellisa Saffiya binti Muhd Supian. Seterusnya bacaan surah An-Naba' daripada penerima anugerah Hafiz Muda Masja-Sa. Di samping itu, murid-murid 6 Tahun turut membuat persembahan di dalam majlis tersebut.

Ucapan penghargaan daripada Adik Hana Nazihah Zarifah sebagai pembuka tirai sebelum istiadat konvokesyen dimulakan. Majlis yang bermula pada pukul 1.30 petang dan berakhir pukul 5 petang berjalan dengan lancar. Syabas dan tahniah diucapkan kepada warga TATTARY dan LAKMNS yang terlibat menjayakan majlis tersebut.



# MAJLIS GRADUASI KE 3 MATTARY

Hari Graduasi Ma'had Tahfiz Tun Abdul-Rahman Ya'kub (MATTARY) telah diadakan pada 24 November 2018, Sabtu bertempat di Dewan Seminar, STIDC. Majlis tersebut telah dirasmikan oleh Puan Megawati binti Haji Julaihi Ketua, Sektor Pentadbiran dan Pengurusan, LAKMNS. Turut hadir, Puan Nona Zaharia binti Fadzil, Ketua, Sektor Kewangan, LAKMNS dan Puan Dayang Siti Aishah binti Haji Mohamad Atei, Wakil Ketua, Bahagian Pelajaran, LAKMNS.

Tujuan majlis ini diadakan adalah untuk memberi sijil penghargaan bagi meraikan kejayaan para murid Tahun 6 di atas kejayaan mereka dalam UPSR dan berjaya menamatkan sesi persekolahan Sekolah Rendah di MATTARY. Selain memberi hadiah galakan kepada para murid Tahun 6 yang telah memperoleh pencapaian cemerlang dalam akademik serta hafazan sepanjang sesi persekolahan Tahun 2018.

Majlis dimulakan dengan nyanyian Lagu Negaraku dan Ibu Pertwiuku, alunan Zikir Asmaul Husna, bacaan doa oleh al-Fadhil Ustaz Muhd Fazlul Karim bin Azahari, persembahan tilawah al-Quran persembahan daripada murid Terbaik Hafazan dan persembahan Bicara Berirama daripada murid Tahun 6.



Majlis diteruskan dengan persembahan nyanyian daripada murid Tahun 6 dan ucapan penghargaan daripada adik Azib Zafrie bin Nafie, Ketua Murid MATTARY, ucapan oleh Encik Abdullah bin Othman, Guru Besar MATTARY serta ucapan daripada Puan Megawati binti Haji Julaihi, Ketua, Sektor Pentadbiran dan Pengurusan, LAKMNS.

Penyampaian anugerah telah disampaikan oleh Puan Megawati binti Haji Julaihi, Ketua, Sektor Pentadbiran dan Pengurusan, LAKMNS untuk Sijil Graduasi MATTARY 2018 seramai 49 orang, Anugerah Murid Terbaik Hafazan dan Anugerah Khas.

Sambutan Majlis Graduasi ke-3 2018 telah berjalan dengan lancar dan mencapai objektif yang telah dicadangkan. Murid-murid berasa gembira dengan kejayaan masing-masing yang diraikan bersama ibu bapa dan para guru mereka. Malah ibu bapa turut berkongsi rasa gembira dan berterima kasih kepada pihak MATTARY dan LAKMNS atas segala usaha yang telah diberikan sepanjang persekolahan anak mereka selama ini. Akhir sekali, semoga program Majlis Graduasi ini dapat diteruskan dengan gilang-gemilang pada masa akan datang.





LAWATAN DARI TERRENGANU



PROGRAM PLEDGE AND PLANT A TREE



KONTINJEN  
PERBARISAN  
LAKMNS KETIKA  
SAMBUTAN  
PERAYAAN HARI  
LAHIR YANG KE  
82 TUAN YANG  
TERUTAMA  
YANG DI-  
PERTUA NEGERI  
SARAWAK



MAJLIS PERSARAAN PUAN DAYANG ENN &amp; ENCIK HAJI RABAIEE OMAR



PROGRAM PEMERKASAAN WARGA PELAJARAN



BENGKEL  
PEMANDU  
BERHEMAH

# SERUAN **MIMBAR**

Tarikh: (21 Disember 2018M/ 13 Rabiulakhir 1440H  
Sumber: <https://mis.sarawak.gov.my/>

Kaum muslimin yang dirahmati Allah,

Marilah kita bertakwa kepada Allah S.W.T. dengan sebenar-benar ketakwaan, dengan mentaati segala perintah-Nya dan menjauhi segala larangan-Nya. Semoga Allah S.W.T. mengurniakan kepada kita kemantapan iman dan takwa, amin. Pada hari ini khatib akan membicarakan tajuk "Zakat Meneguh Sosioekonomi, Menebar Rahmat Lil-'Alamin".

Kaum muslimin yang dirahmati Allah S.W.T.,

Antara kurniaan nikmat yang diberikan oleh Allah S.W.T. kepada kita ialah nikmat memiliki harta dan kekayaan. Kedua-dua nikmat ini sebagaimana yang disebut oleh ar-Raghib al-Isfahani rahimahullah ialah nikmat berada di dalam keadaan yang baik dan hidup yang sempurna. Ia merupakan medan untuk menguji manusia bagaimana mereka menggunakan harta tersebut bagi meraih keredhaan-Nya. Firman Allah S.W.T. di dalam surah al-Isra', ayat 30 yang bermaksud:-

"Sesungguhnya Tuhanmu lah yang meluaskan rezeki bagi sesiapa yang dikehendaki-Nya (menurut undang-undang peraturan-Nya), dan ia juga yang menyempitkannya (menurut yang demikian). Sesungguhnya, ia Maha mendalam pengetahuan-Nya, lagi Maha melihat akan hamba-hamba-Nya".

Nikmat kekayaan dan kesenangan tidak akan tercapai maksudnya melainkan harta tersebut diurus dengan baik dan menurut Objektif Syariah (Maqasid Syariah). Dalam konteks kita di Malaysia hari ini, kita menggunakan Piawaian Pematuhan Syariah (Indeks Syariah). Semua ini adalah dengan satu tujuan iaitu mengharapkan redha dan rahmat Allah S.W.T. di dunia dan di akhirat.

Kaum muslimin yang dirahmati Allah S.W.T.,

Ketika ini, secara umumnya kita sedang berdepan dengan kos sara hidup yang tinggi, peningkatan taraf hidup yang mencabar, dan cabaran ekonomi serantau dan global yang tidak menentu. Ini secara tidak langsung menuntut agar setiap individu muslim mengurus dan merencanakan pengurusan ekonomi dan kewangannya secara berhemat, bijaksana dan adil.

## **"ZAKAT MENEGUH SOSIOEKONOMI, MENEBAR RAHMAT LIL-'ALAMIN"**

Pengurusan ekonomi dan kewangan secara berhemat telah menjadi anjuran di dalam al-Quran kepada orang yang beriman. Ia merupakan manifestasi ciri-ciri hamba Allah (Ibadur-Rahman) seperti yang terangkum di dalam surah al-Furqan, ayat 67 yang bermaksud:- "Dan juga mereka (yang diredhai Allah itu lahal) yang apabila membelanjakan hartanya, tiadalah melampaui batas dan tiada bakhil kedekut; dan (sebaliknya) perbelanjaan mereka adalah betul sederhana di antara kedua-dua cara (boros dan bakhil) itu".

As-Syahid Syed Qutb rahimahullah tatkala menafsirkan ayat tadi menerusi karya monumentalnya, Tafsir Fi Zilalil Quran, menegaskan bahawa:-

"Inilah ciri Islam yang direalisasikan di dalam kehidupan individu, jamaah (masyarakat) dan umat, ia memberi pengarahan dalam bentuk mendidik dan penguatkuasaan undang-undang. Semuanya tegak berdiri di atas prinsip-prinsip keseimbangan dan keadilan ..."

Seorang muslim, meskipun diiktiraf hak pemilikan individu, namun tidak bermakna dia bebas membelanjakan hartanya sesuka hati, seperti mana yang diamalkan oleh para pemodal neo-kapitalisme liberal! Malah amalan tersebut jika dilakukan amat bertentangan dengan Prinsip Syariah.

Kaum muslimin yang dirahmati Allah S.W.T.,

Sesungguhnya, harta di dalam Islam diikat dengan prinsip bersederhana antara dua perkara iaitu tidak boros dan tidak kikir.

Sikap boros membawa kerosakan kepada diri, harta dan masyarakat, malah negara. Manakala kikir pula menghalang harta daripada dimanfaatkan oleh pemiliknya bagi kepentingan masyarakat. Sedangkan harta antara wahana penting untuk mewujudkan keadilan sosial (al-'adalah al-jittima'iyyah) dalam masyarakat, umpamanya, menerusi amalan bersedekah, berzakat dan berwakaf.

Justeru, kehadiran Islam adalah untuk mengatur aspek ini yang merupakan sebahagian daripada kehidupan bermula, dari peringkat individu, keluarga, masyarakat dan negara. Nilai 'keadilan' yang menjadi satu ciri daripada ekonomi Islam yang juga disebut sebagai ekonomi manusawi, sangat berhemat dan berkhidmat untuk umat sejagat.

Ekonomi Islam ditakrifkan oleh kebanyakan sarjana sebagai sains sosial yang mengkaji masalah ekonomi yang berpegang kepada nilai-nilai Islam. Ia lebih bersifat komprehensif berbanding dengan ekonomi konvensional kerana tidak mengabaikan faktor-faktor bukan ekonomi seperti etika, moral, sosial dan politik.

Secara teori, apabila wujud golongan miskin dan golongan berada atau kaya, maka akan wujudnya kelas. Justeru, wujudnya dua golongan ini, bermakna berlaku ketidakseimbangan atau sistem yang tidak sekata di dalam masyarakat. Jadi, apabila setiap individu daripada golongan kaya membayar zakat, dan diagihkan mengikut nisbah asnaf yang telah ditetapkan, maka dia telah mengimbangi keadaan itu dengan cara mewujudkan apa yang tiada di pihak golongan miskin atau menambah apa yang kurang.

Zakat sebagai 'pembersih' atau 'penyuci' roh hasil harta-harta tersebut yang lahir di dalam bentuk dividen, bonus, lebih untung dan sebagainya. 'Pembersihan' atau 'penyucian' itu dilakukan melalui pembayaran zakat, yang mana harta yang dizakatkan itu diagihkan pula kepada golongan asnaf yang berhak menerimanya sebagai sumber pendapatan dan ekonomi mereka pula, untuk diusahakan.

Seperti yang telah dicontohkan sebelumnya, proses yang sama boleh dan akan berulang secara berterusan dan berantai sehingga kemiskinan dapat dibasmikan. Apabila ini terjadi, maka jurang perbezaan tadi dapat dikurangkan, atau lebih idealnya langsung dapat dihapuskan.



Di dalam pengertian yang lebih tepat, zakat itu sebenarnya adalah hak yang dikembalikan kepada yang berhak, bagi memastikan keadilan ekonomi di dalam masyarakat Islam. Hal ini telah dijelaskan di dalam sabda baginda salallahu alaihi wasallam di dalam sebuah hadis yang diriwayatkan oleh Imam Muslim rahimahullah, daripada Ibnu Abbas radhiyallahu anhuma yang bermaksud:-

Sesungguhnya, Muaz radhiyallahu anhu berkata: "Aku telah diutuskan oleh Rasulullah salallahu alaihi wasallam." Baginda bersabda : ((Engku akan mendapati golongan Ahli Kitab, oleh itu ajaklah mereka supaya mengakui bahawa tidak ada Tuhan yang disembah selain Allah, dan sesungguhnya aku Pesuruh Allah. Jika mereka telah mematuhi yang demikian, terangkanlah kepada mereka bahawa Allah mewajibkan mereka solat lima kali sehari semalam. Kalau mereka mentaatinya, ajarkanlah bahawa Allah memerintahkan kepada mereka supaya membayar zakat dari harta mereka yang dipungut dari orang kaya mereka dan dikembalikan kepada orang fakir miskin ...)).

Akhirnya, semoga Allah S.W.T. mengurniakan kepada kita taufiq dan hidayah untuk sentiasa bersedia mentaati segala perintah dan larangan Allah S.W.T. dan RasulNya S.A.W. termasuklah dalam menuaikan kewajipan zakat. Marilah kita menghayati firman Allah S.W.T. dalam surah al-Baqarah, ayat 277 yang bermaksud:-

"Sesungguhnya orang-orang yang beriman dan beramal soleh, dan mengerjakan solat serta memberikan zakat, mereka beroleh pahala di sisi Tuhan mereka, dan tidak ada keimbangan (dari berlakunya sesuatu yang tidak baik) terhadap mereka, dan mereka pula tidak akan berduakacita".



# Haflah AL-FANIYYAH (HAFA') 2018

Tadika Tahfiz Tun Abdul-Rahman Ya'kub (TATTARY) telah mengadakan Majlis Haflah Al-Faniyyah (Hari Kesenian) Ke-3 pada 20 November 2018 bertempat di anjung kanan Masjid Jamek Negeri Sarawak.

Tujuan utama majlis ini diadakan adalah untuk menggalakkan anak-anak cilik 4 dan 5 tahun TATTARY memupuk keyakinan diri yang tinggi dalam diri di samping mencungkil bakat seni mereka.

Majlis HAFA' pada kali ini dirasmikan oleh Puan Dayang Siti Aishah binti Haji Mohd Atei, Wakil Ketua, Bahagian Pelajaran LAKMNS dan pelbagai persembahan daripada enam buah kelas yang telah dipertontonkan pada hari tersebut.

Objektif utama program HAFA' ini dijalankan adalah seperti berikut :-

- Untuk meningkatkan daya keyakinan diri untuk tampil berdiri di khalayak ramai dan melakukan persembahan dengan baik seperti yang telah dilatih.
- Untuk melahirkan murid-murid yang berkualiti seiring dengan pencapaian hafazan, akademik dan juga kesenian.
- Untuk melatih serta memberi galakan kepada murid-murid mengambil penyertaan dalam aktiviti yang dijalankan di sekolah.

Semoga majlis Haflah Faniyyah ini dapat mencapai objektif yang telah disasarkan oleh guru-guru kepada anak-anak TATTARY. Diharapkan program ini dapat dijalankan dengan sifat silaturrahim yang erat dan kerjasama yang padu dari pada semua pihak.



## SESI UJIAN DAN TEMUDUGA MURID MATTARY TAHUN 6 UNTUK KEMASUKAN TINGKATAN SATU

Pada 16 dan 17 November 2018, hari Jumaat dan Sabtu berlangsungnya sesi ujian dan temuduga kemasukan Tingkatan 1 di Sekolah Menengah Agama Sheikh Haji Othman Abdul Wahab, (SMK A SHOAW) Tahfiz Model Ulul Albab (TMUA) dengan dihadiri oleh murid Tahun 6 Ma'had Tahfiz Tun Abdul-Rahman Ya'kub (MATTARY).

Ujian kemasukan untuk Tahfiz Model Ulul Albab (TMUA) kini semakin mendapat perhatian dan pilihan pelajar dan ibu bapa kerana model pembelajaran yang sangat baik. Dengan adanya program Tahfiz Model Ulul Albab ini, ia membuka ruang untuk murid MATTARY meneruskan kesinambungan pembelajaran Tahfiz al-Quran ketika di peringkat Ma'had Tahfiz.

Ujian saringan tersebut meliputi hafazan dan tulisan jawi. Murid-murid dikehendaki menghafal ayat al-Quran dalam tempoh masa yang diberikan serta menjawab sesi temuduga bagi menguji sahsiah dan kecenderungan murid-murid.

Beberapa orang guru turut hadir bagi memberi sokongan dan bimbingan kepada semua murid Tahun 6 yang datang untuk ulian dan temuduga tersebut.



## Hari Pendaftaran Kemasukan Tadika Tahfiz Tun Abdul-Rahman Ya'kub

Hari Pendaftaran bagi kemasukan murid-murid ke TATTARY bagi sesi persekolahan 2019 telah diadakan pada hari Rabu dan Khamis, 26 dan 27 Disember 2018 yang lalu di Pejabat Tadika Tahfiz Tun Abdul-Rahman Ya'kub (TATTARY) bermula pada jam 9.00 pagi hingga 4.00 petang.

Hari Pendaftaran yang diadakan dua hari berturut-turut tersebut dimulakan dengan pendaftaran bagi murid baru pada Rabu, 26 Disember 2018. Murid-murid baharu adalah terdiri daripada murid 4 tahun seramai 70 orang, 11 orang murid 5 tahun dan 3 orang murid 6 tahun bagi memenuhi kekosongan yang sedia ada. Sambutan dan kerjasama daripada ibubapa juga adalah amat baik dan program berjalan dengan lancar.

Pendaftaran pada hari kedua pula adalah melibatkan murid lanjutan yang telah berdaftar di TATTARY sejak tahun 2017 dan 2018. Kehadiran ibu bapa dan murid pada hari tersebut juga adalah amat menggalakkan dan kerjasama daripada ibu bapa turut memudahkan urusan pendaftaran. Selain makluman berkenaan hari pendaftaran, guru-guru turut memaklumkan kepada ibu bapa murid baharu berkenaan Hari Mesra yang akan diadakan pada Sabtu, 29 Disember 2018 yang hanya melibatkan murid-murid baru sahaja.



Terdapat juga ibubapa yang tidak dapat hadir pada kedua-dua hari tersebut namun telah membuat bayaran pendaftaran terlebih awal dengan menggunakan kaedah tunai, cek dan paling memudahkan ibubapa adalah bayaran secara atas talian ke akaun Lembaga Amanah Kebajikan Masjid Negeri Sarawak. Enrolmen bagi kemasukan ke TATTARY bagi sesi persekolahan 2019 adalah amat memberangsangkan dengan hampir 97% kemasukan ke TATTARY penuh. Semoga tahun-tahun akan datang peningkatan kemasukan dari tahun ke tahun adalah semakin memberangsangkan.

# Syabas Dan Tahniah

## Pelajar-Pelajar Tahun 6 MATTARY Di Dalam Ujian Penilaian Sekolah Rendah (UPSR)



AHMAD UWAIIS AL QARNI BIN ABDULLAH



HANAN ZABIRAH BINTI ZAWARDY

**7A**MOHAMMAD NABIL AIZAT  
BIN MOHAMMAD SANI**5A 1B**MUHAMMAD AUFA  
NADZMIE BIN HAIROLL**5A 1B**HAZIQ IMAN BIN  
SAKAWI**4A 2B**MIA ADRIANA BINTI  
MUHAMMAD ABU ZAID**4A 2B**MOHAMAD FIRDAUS  
BIN HAPPSUPINA**4A 2B**MUHAMMAD ALEEY  
ADZEEM BIN ANUDDIN**4A 2B**THAQEEF RIDHAUDDIN  
BIN MOHAMAD LUFTI**4A 2B 1C**MUHAMMAD SYAFIF AKWA BIN  
MOHAMAD SAHARI**4A 2B 1C**HALIMATUSSA'DIAH  
BINTI AZHAR**3A**HANAN ZAFIRAH BINTI  
ABDUL PATA**3A**NURUL BATRISYIA BINTI  
MOHAMAD FAISAL**3A****BUMBUNG**

Bumbung masjid yang baharu dibina menggunakan konkrit yang rata dan terlindung oleh tembok-tembok di sekelilingnya. Di atas tembok itu pula dapat dilihat rekaan berbentuk bulan sabit yang berada di atas bulatan.

**KEMUDAHAN**

Secara keseluruhannya, terdapat 418 buah lampu ditempatkan di dalam serta sekitar masjid termasuklah kipas angin. Cahaya dari lampu masjid mampu menyinari segenap ruang kawasan masjid terutama sekali sinaran lampu yang memancar dari atas keempat-empat menara penjuru masjid tersebut.

Masjid ini juga mempunyai kelengkapan alat pembesar suara dan pemancarnya disalurkan pada tiap-tiap menara bagi membolehkan masyarakat mendengar laungan azan yang berkumandang di masjid sebagai tanda telah masuknya waktu sembahyang.

**PERKHIDMATAN**

Masjid Bandaraya Kuching juga menyediakan kelas Taklim Wanita pada sebelah pagi. Kemudahan seperti bilik mesyuarat serta bilik rehat untuk tetamu khas turut disediakan. Kegiatan waktu malam seperti majlis-majlis ilmu dan pembacaan al-Quran turut menghidupkan suasana Masjid serta membawa bersama suasana kesyahduan keagamaan yang merupakan suatu tradisi yang sinonim dengan budaya dan tamadun Islam.

**PENUTUP**

Selain menjadi tempat beribadah, masjid juga dilihat sebagai lambang kebesaran dan keluhuran Agama Islam. Oleh itu, dengan terbinanya Masjid Negeri Sarawak (kini dikenali sebagai Masjid Bandaraya Kuching) yang kelihatan indah dan permai serta tersergam dengan megahnya, maka terlaksanalah cita-cita kaum muslimin negeri Sarawak untuk memiliki sebuah masjid yang lebih besar dan lengkap untuk kemudahan mereka mendekatkan diri kepada Yang Maha Esa.

# SEJARAH AWAL MASJID BANDARAYA KUCHING

Sambungan dari isu Buletin Mimbar 141



# 6

## Tempat Simpanan Kewangan Paling Bagus Yang Memberi Manfaat Pada Masa Hadapan

### PERANCANGAN

#### KEWANGAN

Di usia yang masih muda, kita seharusnya lebih memikirkan tentang kewangan masa hadapan lebih-lebih lagi dalam keadaan ekonomi negara dan dunia yang tidak stabil.

Penyimpanan wang adalah penting untuk setiap individu dan bergantung kepada individu terbabit untuk menyimpan berapa peratus untuk setiap bulan daripada pendapatan mereka.

Oleh yang demikian, terdapat enam (6) tempat penyimpanan yang disyorkan yang dapat memberi manfaat kepada kita pada masa hadapan seperti berikut:-

#### 1. Amanah Saham Bumiputera (ASB)

Individu yang ingin melabur ke dalam ASB perlu ada matlamat pelaburan seperti untuk membeli rumah, perbelanjaan perkahwinan atau melancong ke luar negara. Melabur mengikut kemampuan adalah penting kerana ia melibatkan komitmen bulanan yang perlu kita lakukan.

Selain itu, perlu bezakan antara "force saving" dan simpanan ASB. Pinjaman ASB akan menjurus kepada force saving, manakala pelaburan ASB biasa ialah simpanan ASB.

#### 2. Tabung Haji

Antara kebaikan menyimpan menggunakan simpanan Tabung Haji adalah seperti berikut:-

- Modal awal yang rendah
- Modal simpanan dijamin
- Kos yang rendah
- Pemberian dividen dan bonus kompetitif
- Dividen dan bonus dikecualikan cukai
- Zakat dibayar pihak Tabung Haji
- Simpanan dan pengeluaran tanpa had
- Patuh syariah
- Simpanan untuk menunaikan Haji

#### 3. Private Retirement Scheme (PRS) atau Skim Persaraan Swasta

PRS ini melengkapkan plan simpanan persaraan wajib seseorang melalui Kumpulan Wang Simpanan Pekerja (KWSP). Ia juga dijadikan sebagai simpanan tambahan untuk persaraan dan ia dapat melawan inflasi serta berpeluang mendapat pulangan pelaburan yang baik.



b. Dividen: Dana yang lebih 2 tahun mesti mempunyai dividen.

c. Bonus: Bergantung kepada pengumuman syarikat

Kebaikan melabur pada Unit Trust adalah kerana pelaburan ini mempunyai konsultan yang akan memantau akaun pelanggan.

#### 4. Simpanan Emas

Bagi individu yang gemar untuk melakukan simpanan jangka masa panjang, simpanan atau pelaburan emas adalah lebih digalakkan pada masa ini berbanding simpanan dalam bentuk tunai di bank kerana:-

- Nilai jangka panjang terjamin
- Mudah dicairkan - emas adalah tunai
- Kekayaan di tangan kita
- Boleh dijadikan sebagai modal pusingan
- Aset mudah alih (mobile)
- Aset fizikal mampu milik
- Menutup nafsu berbelanja (kekayaan bertahan lama)

#### 5. Unit Trust


Unit Trust merupakan simpanan jangka masa sederhana hingga masa panjang. Biasanya matlamat yang ditetapkan bagi simpanan jenis ini ialah persaraan, pendidikan anak, Haji/Umirah, beli rumah ataupun berkahwin.

Bila sampai hujung tahun, anda boleh keluarkan duit simpanan tersebut dan laburkan di tempat yang betul.

Terdapat 3 jenis keuntungan Unit Trust seperti:-

- Capital gain:* Harga yang tidak menentu iaitu naik turun. Kedua-dua keadaan ini sebenarnya bagi kelebihan kepada klien. Seperti contoh, beli masa murah, jual masa mahal!

## PROFIL KAKITANGAN



Koperal Awang Zulkarnain bin Hussein  
Tarikh Lahir : 21 Februari 1979

Umur : 40 tahun  
Asal : Sabah  
Tarikh Mula Berkhidmat : 2 Mei 2014



Awang Zulkarnain turut bergiat aktif dalam bidang sukan dan ini dapat dibuktikan apabila beliau pernah mewakili LAKMNS dalam sukan bola sepak anjuran Agensi-agensi Islam serta menyertai perbarisan rapat raksasa.

Beliau turut menghabiskan waktu lapang pada hujung minggu dengan bersantai dan berjalan-jalan bersama keluarga tercinta.

Peribahasa ada menyatakan, "Getah daun akan mengalir ke batang jua," bermaksud anak-anak sudah pasti menuruti ibu bapa dalam hal tingkah laku dan sikap. Justeru itu, Awang Zulkarnain telah menjadikan Allahyarham bapanya sebagai role model dalam membimbing serta membentuk keluarga yang bahagia.

Oleh yang demikian, besarlah harapan beliau agar LAKMNS sentiasa terus maju ke hadapan dan diberkati Allah S.W.T. seiring dengan peredaran masa.



## PROFIL GURU MATTARY



Ustaz Ahmad Fazrin bin Omar  
Tarikh Lahir : 26 Julai 1987  
Umur : 31 tahun  
Asal : Pahang Darul Makmur  
Tarikh Mula Berkhidmat : 27 Mei 2013



Ustaz Ahmad Fazrin bin Omar dilahirkan pada 26 Julai 1987 di negeri Pahang dan merupakan salah seorang tenaga pengajar di Ma'had Tahfiz Tun Abdul-Rahman Ya'kub (MATTARY).

Kini, Ustaz Ahmad Fazrin menetap di Samariang Aman, Fasa 2, Bandar Baru Samariang bersama isteri tercinta iaitu Maisarah binti Abdul Ghafar dan dua orang putera iaitu Muhammad Danial Luqman dan Muhammad Luqman Hakim.

Beliau mendapat pendidikan di Madrasah Wata'ilimul Quran Jerantut, Pahang Darul Makmur dalam bidang hafazan al-Quran dan mendapat Sijil Tinggi Agama Islam.

Di MATTARY, Ustaz Ahmad Fazrin mengajar pelajar-pelajar dalam halaqah Imam Abu Amru. Antara anak didiknya ialah Thaqeef Ridhaudin yang telah berjaya menghafal sehingga Juzuk 4.

*Ustaz Ahmad Fazrin bersama rakan-rakan pengajar MATTARY bermain 'bola sepak kain pelikat' sempena Program Pasca UPSR.*



*Ustaz Ahmad Fazrin bergambar kenangan bersama keluarga semasa Hari Raya Aidilfitri*

## PROFIL PELAJAR MATTARY



Nama penuh: Thaqeef Ridhauddin bin Mohamad Lufti  
Umur: 12 tahun

Asal: Kuching, Sarawak  
Hobi Mengaji dan menghafal al-Quran  
Makanan dan Minuman Kegemaran Mi Kolok dan Teh Tarik

Cita-cita Ingin menjadi seorang Saintis Al-Hafiz yang berjaya

Thaqeef Ridhauddin bin Mohamad Lufti dilahirkan pada 7 Disember 2006 di Hospital Umum Sarawak dan merupakan anak sulung daripada tiga orang adik-beradik.

Thaqeef Ridhauddin atau lebih mesra dipanggil adik Thaqeef merupakan pelajar Tahun 6 Al-Biruni di Ma'had Tahfiz Tun Abdul-Rahman Ya'kub (MATTARY) dan pernah menerima pendidikan awal di Tadika Tahfiz Tun Abdul-Rahman Ya'kub (TATTARY).

Adik Thaqeef merupakan anak yang cerdik serta pandiaman dan sering mewakili MATTARY dalam persembahan hafazan, pertandingan hafazan dan nasyid. Kemerduan alunan suaranya ketika membaca ayat-ayat suci al-Quran amat dikagumi.

Sempena Majlis Khatamul Al-Quran 1439H/2018M yang lalu, adik Thaqeef telah dinobatkan sebagai murid terbaik MATTARY dan turut membuat persembahan pada majlis tersebut. Adik Thaqeef telah membaca surah ad-Dukhan bergandingan bersama dua orang rakannya iaitu adik Ziziliyana Aqilah dan adik Awang Ahmad Gabriel.



*Adik Thaqeef bergambar kenangan bersama keluarga semasa Hari Raya Aidilfitri yang lalu*

# PROFIL PELAJAR TATTARY



Nama penuh: Mia Syazwina binti  
Mohamad Osman  
Tarikh Lahir: 15 April 2012  
Umur: 6 tahun  
Asal: Kuching, Sarawak  
Hobi  
Membaca buku dan bersukan  
Cita-cita  
Menjadi seorang guru

Adik Mia Syazwina binti Mohamad Osman merupakan anak bongsu daripada empat adik beradik kepada pasangan suami isteri Mohamad Osman Alladin dan Shamsiah Suib telah dilahirkan pada 15 April 2012 di Hospital Umum Sarawak, Kuching.

Lebih mesra dengan nama panggilan Wina, adik Wina seorang yang berperwatakan mudah mesra, ceria, suka membantu, berdikari dan penyayang. Di samping itu, adik Wina amat menyayangi haiwan peliharaan terutamanya kucing.

Adik Wina mula mendapat pendidikan awal secara formalnya di Tadika Tahfiz Tun Abdul-Rahman Ya'kub (TATTARY) semenjak usia 4 tahun. Kini, adik Wina belajar di kelas 6 Bijak di bawah didikan Ustazah Siti Hajar, Cikgu Sutijah dan Cikgu Nurhairiah.

Pembelajaran awalnya secara tidak formal adalah melalui abang dan kakaknya di rumah yang secara tidak langsung telah menimbulkan minat di dalam pembelajaran akademik, pengajian agama serta hafazan al-Quran. Kemajuan yang ketara oleh adik Wina dalam pembelajaran adalah hasil daripada bimbingan dan didikan serta tunjuk ajar daripada guru-guru di TATTARY. Di samping pembelajaran di sekolah, ibu bapanya juga memberi dorongan untuk adik Wina mengulangkaji di rumah.



**Adik Mia Syazwina mendapat tempat ke-2 dalam Pertandingan Mewarna sempena Hari Kemerdekaan peringkat TATTARY pada bulan September yang lepas.**

**Sinar Hidayah**

*A*da ketikanya sesuatu pertemuan itu akan membiarkan kita lupa tentang refleksnya iaitu perpisahan. Bagai aur dengan tebing, bagai isi dengan kuku, tidak dapat dipisahkan. Perpisahan yang semestinya akan tiba di suatu penghujung tanpa pengetahuan kita.

Setiap yang bertemu pasti berpisah. Maka ketika perpisahan berada tepat di hadapan kita, kita memilih untuk mengendahkannya terasa terlalu sayang tentang pertemuan. Sehingga akhirnya, kita menciptakan suatu dinding kukuh yang tak boleh diruntuhkan oleh siapa pun atau apa pun.

Perpisahan punya cara tersendiri untuk kita. Perpisahan yang memutarbalikkan keinginan membuat segalanya menjadi sesuatu yang masuk akal. Untuk sesaat, akhirnya kita akan mengangguk mengerti. Kemudian saat perpisahan telah membawa dirinya pergi jauh, kita mengerti bahawa itu adalah aturan Yang Maha Mengetahui.

Semua aturan berjalan pada ceritera kehidupan masing-masing, sekalipun kita cuba untuk keluar melangkah hari ini kita masih ditakdirkan di belakang, kita akan tetap di belakang.

Setiap insan yang dilahirkan untuk sebuah kisah yang tidak sesekali boleh diramal dengan tepat kecuali oleh Yang Maha Mengetahui segalanya. Pertemuan dan perpisahan adalah ketentuanNya. Tidak ada yang salah dengan ketentuanNya, kecuali cara kita melaluinya. Dan sering kali kita lelah mengikuti aliran air mata, namun janganlah sesekali kita hanyut jauh ke dalamnya. Biar aliran air mata itu sekadar melepas kerinduan di dalam bait-bait selingan kata ketika kita bermunajat kepada Yang Maha Mendengar.

Mengapa kita harus hanyut dalam limpahan air mata sementara masih ada daratan yang boleh dijejaki dicipta oleh Yang Maha Kuasa? Mengapa ada yang terlupa, dunia kini berputar pantas, kehidupan sementara, mengapa pula harus terus hanyut jika aliran air mata itu membawa masuk ke arah kufur nikmat?

Ayat-ayat cinta dari Allah sudah tertulis dalam firman Nya dalam Surah Al Baqarah ayat 155. “Dan sungguh kami akan mengujimu dengan ketakutan, kelaparan, kekurangan dalam hal harta, jiwa, dan buah-buahan, dan berilah khabar gembira terhadap orang-orang yang bersabar”

Janganlah bersedih atas keinginan kita yang tidak terwujud.

**Heiruzam Filani Bin Mohamad  
UNIT PENERBITAN**





**BORANG PENYERTAAN KELAS AL-QURAN DEWASA  
ANJURAN PUSAT PENGAJIAN AL-QURAN TUN ABDUL-RAHMAN YA'KUB (PATARY)**

**PERHATIAN:**

- I. Silakan boleh dengan tulisan yang telak dan benar-benar semata-mata.
- II. Sila setimbang 1 satuan kad pengenalan.
- III. Yuan Penyertaan dikurangkan RM 50.00 tetapi bukan
- IV. Bayaran yuan hendaklah dibukukan pada seceder awal bulan

UNTUK KEGUNAAN PEJABAT:	:
NO. RESIT	:
TARIKH TERIMA	:
TARIKH/COP TERIMA	:

**MAKLUMAT DIRI**

NAMA	:
JANTINA	:
NO. KAD PENCENALAN	:
TARIKH LAHIR	: UMUR
ALAMAT	:
NO. TELEFON	:
TARAF PENDIDIKAN	: (Pilihni)
ALAMAT MAJIKAN	: (Pilihni)
PEKERJAAN	: (Pilihni)

**SILA TANDA '✓' PADA YANG BERKENAAN**

KELAS ASAS	:
KELAS PERTENGahan (TA'AWUD)	:
KELAS MAHIR (TARAF NUM)	:

**PERAKUAN PEMOHON**

Saya mengaku bawa ke semua keterangan di atas adalah benar dan akan mematuhi syarat-syarat yang ditetapkan oleh pihak pengaju.

Tarikh : \_\_\_\_\_ Tandatangan : \_\_\_\_\_  
**UNTUK PERTANYAAN SILA HUBUNGKU :**  
NO. TEL : 082-443232 / 082-449813 (USTAZ ZAIDI BIN SAKAM / PUAN DAYANG MIZWATI BINTI ABANG TAHAN)  
NO. FAX : 082-449815

\* Pindahari tarikh Kelas Al-Quran merupakan keperluan Tenaga Pengajar.



**KURSUS  
Dre Diketahui**

**RM100.00 SEORANG**

**BORANG PENYERTAAN**

\* Sila lengkapkan ruang kosong dibawah. Borang yang tidak lengkap akan ditolak.

NAME:	:
NO. KAD PENGENALAN:	:
TARIKH LAHIR:	: UMUR:
ALAMAT:	:
NO. TELEFON:	:
TARAF PENDIDIKAN:	: PEKERJAAN:
ALAMAT MAJIKAN:	:

**TARIKH KURSUS YANG DIPILIH**

\* Sila tanda (/ ✓ ) pada kotak yang berkenaan.

- |  |  |  |
|--|--|--|
| <input type="checkbox"/> 19 & 20 JANUARI 2019  | <input type="checkbox"/> 15 & 16 JULAI 2019  | <input type="checkbox"/> 16 & 17 NOVEMBER 2019 |
| <input type="checkbox"/> 16 & 17 FEBRUARI 2019 | <input type="checkbox"/> 17 & 18 Ogos 2019   | <input type="checkbox"/> 14 & 15 DISMBER 2019  |
| <input type="checkbox"/> 16 & 17 MAC 2019      | <input type="checkbox"/> 7 & 8 SEPTMBER 2019 | <input type="checkbox"/> 12 & 13 OKTOBER 2019  |
| <input type="checkbox"/> 14 & 15 APRIL 2019    |  |  |

TARIKH TUTUP PENDAFTARAN: 7 hari bekerja [seminggu] sebelum tarikh kursus bermula.

**PERAKUAN PEMOHON**

Saya mengaku bawa ke semua keterangan di atas adalah benar dan akan mematuhi syarat-syarat yang ditetapkan oleh pihak pengaju.

Tandatangan: \_\_\_\_\_ Tarikh: \_\_\_\_\_

UNTUK KETERANGAN LAINUT SILA HUBUNGKU:  
NO. TEL : 082-443232 / 082-449813 (USTAZ ZAIDI BIN SAKAM / PUAN DAYANG MIZWATI BINTI ABANG TAHAN)  
NO. FAX: 082-449815 | EMAIL: palansakm1@gmail.com